

Ғасырдан қымбат уақыт!

Менің елім – Қазақстан! Осынау құдіретті сөзді әрбір Қазақстан Республикасының азаматы асқақ сезіммен, ерекше мақтанышпен айта алары сөзсіз. Туған елдің мағынасы тереңде жатыр. Балғын балалық шақ! Күлдір-күлдір кісінеп, айнала шапқылаған құлыншақ. Жетісудың Қаратал өзенінің маңы – менің туған өлкем. Үстінде үйіріліп ұшқан шағала, бетінде жүзген үйрек-қаз, кермеңі келіп еркелей соққан көгілдір су. Күннің қызғылт шапағына бөленген үйлер, осының бәрі – тұтас тұрған менің туған жерім!

Неткен байтақ, неткен ұлы жер едің,
Неңдей күйге жүрегімді бөледің.
Сенде тудым, сенде өстім, сенде өлсем,

Арнымым жоқ бұл дүниеде дер едім, –
деп Қасым Аманжолов жырлағандай
бұл – менің қасиетті мекенім.

Қойнауы қазынаға толы құнарлы жерімізге кімдер көз тікпеді? Қазақ жеріне иелік ету үшін қаншама рет шабуыл жасап, елді тыныш қоймады. Бірақ ер-жүрек ата-бабаларымыз сыртқы жаудың қимылын бағып, тойтарыс беріп отырды. Сол батыр бабаларымыздың арқасында, халықтың бірлігінің арқасында ел өзінің кең байтақ жері, құт мекенінде еркін көсіліп, жайланып жатыр. Ержүрек батыр бабаларымыздың арқасында бүгінгі жар-қын болашаққа жетіп отырмыз. Алапат ерлік те, ғажайып қаһармандық та айбынды елі бардан шығады.

Атажұрт, атамекен – өте кең ұғым. Атамекен – адамның ата-бабаларынан бері қарай кіндік қаны тамып, өсіп-өніп келе жатқан жері, өмірден көретін қызығы мен бақытының тұрағы. Біздің халқымызда атамекенді ардақтау сезімі өте терең, туған жерді қасиет тұту – қанға сіңген мінез, ежелгі дәстүр. Бұл ұғым жанымызға ана сүтімен тараған, ана тілімен дарыған.

Қазақ елі – сонау Алтайдан Пиренейге дейін билік еткен Еділ батырдың елі. Қазақ елі – асқан батырлығымен, ақыл-парасат-

тылығымен Египет еліне билік жүргізген Бейбарыстың, Үндіні билеген Бабырдың елі. Моңғол шапқыншылығы кезінде туған қаласы Отырарды қасық қаны қалғанша ерлікпен қорғаған Қайыр хан ел тірегі, ел панасы бола білді емес пе?! «Ақтабан шұбырынды, Алқакөл сұлама» аталған халықтың ұлы апаты кезінде ел бірлігін сақтаған Абылай, Әбілқайыр хандардың халқына сіңірген еңбегі, қысылтаяң жағдайда атақты Қазыбек, Төле, Әйтеке билеріміздің азаттық жолындағы күресі туған жерімізді қорғаудың ерен үлгісі емес пе еді?

Қазақ халқы қаһарман да батыр, шешен де күрескер халық. Ол өмір бойы елдікке ұмтылған. Ел басына қаун туғанда талай-талай батырлар шығып, жандарын елін қорғап отырған. Шешендеріміз халықты бірлікке шақырған. Кешегі от жалынды Исатай мен Шернияз, Мохамбеттер де туған жері үшін өз жандарын аямай, ел үшін, жер үшін егеулі найза қолға алып, еңқу-еңқу жер шалды. Осындай ақиық қырандай асыл ерлердің арқасында қазақ халқының айбынын, қасиетін, елдігін танығандай боламын.

Біздің тарих! Бұл дегенің – шежіре, Азап пенен бақ сыйлаған еліне.
Көп болды ғой көз алартқан пенделер,
Қазағымның ұлан-байтақ жеріне, –
деген өлең жолдарында айтылғандай қазақ деген қайсар халықтың ержүрек ұлдары қай кезде болса да, өзінің кіндік қаны тамған жерін жау аяғына тапталмай ерлікпен, ерлікпен қорғай білген.

XX ғасырдың басында тарих сахнасына Алаш зиялылары келді. Ә. Бөкейханов, А. Байтұрсынов, М. Дулатов, Х. Досмұхамедов бастаған зиялылар да тәуелсіздік жолында көп еңбек сіңірді. Төңкеріс жылдары қазақ халқының тілін, жерін, тұтастығын қорғаушылардың көш басында С. Сейфуллин, Т. Рысқұлов, С. Сәдуақасов, С. Қожановтар тұрды. Бұл қайраткерлердің де ел үшін, бостандық, тәуелсіздік үшін күрескенін тарих ұмытпайды. «Отан – оттан да ыстық» деген халық мақалы жай айтылмаған. Елді қорғау – ер-азаматтың парызы. Ата-бабаларымыз ұлан-ғайыр қазақ жерін найзаңыз ұшымен, білектің күшімен сыртқы жаулардан қорғап келді. Өткен

тарихымызды ой елегінен өткізе отырып, ғасырлар қойнауына көз жіберер болсақ, қазақ халқы небір қиын-қыстау кезеңдерді, ауыр күндерді басынан кешірген. Отаны үшін, халқы үшін қабырғасы қайысып, елі үшін еңіреген ер азаматтар қай заманда да болғаны белгілі. Қабанбай, Бөгенбай, Наурызбай сынды батырларымыз елдің тыныштығы, бірлігі үшін, халқымыздың тәуелсіздігі үшін қаншама зұлмат заманды бастаны көшірді. Қазақ сахарасының ұлылары мен ұлдары голощекиндік, сталиндік азаптың құрбаны болды. Еліміз аштықтан қырылып, сүргінге салынып, түрмеге жабылып, сан қиындықты басынан өткерді.

Ал, 1941-1945 жылдары Ұлы Отан соғысы кезінде ең көп қырылған ұлттардың бірі қазақ болды, өз жерін, Отанын қорғау жолында қанға боялды. Ұлы бірліктің арқасында еліміз жеңіс тұғырына қонды. Ежелден ата-бабаларымыз аңсаған еркіндікке әлі қол жеткізбегенімізді байқаған жастарымыз Желтоқсан қозғалысын бастады. «Ұлттық жұртым» дегенде оттай маздаған, шоқтай қоздаған жүректерін намыстары күйдіріп, толассыз тартыс пен күрес жүргізіп, қараңғыдан мәңгілік жарыққа ұмтылуды кездеген Қайрат, Ләззат, Ербол сынды аға-апаларымыз ұлты үшін өлімге басын тікті. Қасиетті жеріміздің иесі олар болмаса, ұлы ұрпақтары қол жеткізіп отырған бостандық туын желбіретіп көкке көтерер ме едік?..

Иә, көк туымыз асқақ желбіреп, тәуелсіздігіміз салтанат құрғанына міне, жиырма бес жылдан асты. Тарих үшін – қас-қағым сәт, азаттық аңсаған Алаш баласы үшін – ғасырдан қымбат, мың жылға айырбастамас жиырма бес жыл!

Тәуелсіздік – азаттықтың алтын діңгегі, ұлттық өрлеудің ұлы күші. Қазақстан, тәуелсіз мемлекет ретінде, дүние жүзіндегі барлық елдерге түгел дерлік танылды. Жер бетінде қанша ұлт болса, сонша арман бар. Сол арманға біздің қазақ халқы жетті.

**Батқалова Ақбота,
МДШО бар Елтай атындағы орта
мектеп оқушысы,
Алматы облысы.**